

四庫全書

史部

欽定四庫全書

史部

歷代名臣奏議卷三百三十四

詳校官編修_臣周瓊

編修_臣裴謙覆勘

總校官編修_臣王燕緒

校對官庶吉士_臣侍朝

謄錄監生_臣陶鳴珂

欽定四庫全書

歷代名臣奏議卷三百三十四

明 楊士奇等 撰

禦邊

宋高宗建炎元年尚書右僕射李綱上言曰臣聞居於山者必高垣墻固柴柵以虞虎狼之害居於野者必盛僮僕厲甲兵以防盜賊之患今日之患害已深矣曾不為防虞之計而裂地厚賂以予之譬猶割肉以啖餓虎

而欲止其搏噬出財以畀彊禦而欲止其侵陵豈可得哉臣所謂三年然後兵可用者謂大舉以報今日之耻也至於守備則自今以往當日為虞害防患之計不可暫輟夫金人既已得其所欲挾二聖卷六宮而北之矣逼脅邦昌使僭位號其意亦豈果在邦昌哉特迫於時月不得不歸知天下之戴趙氏必將有主而陛下總兵于外必為臣民之所推故留此以為中國豐端其意不難知也語曰鞭雖長不及馬腹夫以四方萬里之遠而

金人欲以力經營之故其力之所及者靡不悉取而其
力之所未及者留疊以為異日之圖此必至之理也為
今日守備之策當以河北河東之地建藩鎮立豪傑使
自為守朝廷量以兵力援之而於汾河汾淮汾江置帥
府要郡以控扼修城池備器械屯兵聚糧堅壁清野教
車戰以禦其奔衝習水戰以擊其濟渡使進無所掠退
不得歸則其勢必不敢深入至於陵邊隅破城邑則不
能保其必無也但能備禦今冬不至越軼使國勢漸定

人心稍安則自此得益修軍政吾無患矣臣愚料之金
人秋冬之交決須再來仍分為兩道由河東來者自京
西以擾關中與夏人連謀欲窺川陝由河北來者自京
東以擾淮南與高麗連謀欲窺江浙則京西陝右京東
淮南不可不為之防當擇大帥屯重兵以經略之譬猶
治病當視脉息察邪氣之所入預遏絕之不然待其既
至而後治則無及已惟陛下熟計而幸察

紹興間綱為江西安撫制置大使乞沿淮漢修築城壘

劄子曰臣伏觀手詔車駕將乘茲春律駐蹕建康此誠至當甚盛之舉也臣昨奉詔書條具邊防利害嘗論駐蹕建康為措置之宜所當先者然其說謂淮南有藩籬之固則建康可都宜命諸將移重兵於江北料理營田葺治城壘則藩籬可成今大將既已移屯矣營田既已施行矣楚泗既已修築城壘矣惟是汳淮如廬壽汳漢江如襄鄧等處尚未措畫臣願陛下詔劉光世岳飛乘士卒之暇以漸脩築如韓世忠之於楚張俊之於盱

貽楊沂中之於泗使名城堅壘縣亘相望以張國勢以
驚敵心又命朝廷選通知古今臣僚按行淮漢深考古
跡要害控扼之地如濡須塢牛渚圻之類築壘屯兵益
務自固使藩籬無侵突之虞貔虎有蓄銳之利以守則
固以戰則勝此今日之上策也夫守戰一道也能固守
而後能進戰是守者進之基也譬如奕碁之家凡欲勝
人先須自固此言雖小可以喻大今陛下既已斷自淵
衷不貳不疑駐蹕建康以承天意矣伏望聖慈益脩戰

守之備以建中興之功天下不勝幸甚臣以衰病見丐
間散不勝臣子愛君憂國之誠輒復自竭冒昧以聞或
有可採亦臣仰報聖恩之萬一也干瀆天聰臣無任惶
懼戰越之至

二年綱為觀文殿學士上言荆湖國之上流其地數千里
諸葛亮謂之用武之國今朝廷保有東南控馭西北如鼎
澧岳鄂若荆南一帶皆當屯宿重兵倚為形勢使四川之
號令可通而襄漢之聲援可接迺有恢復中原之漸

建炎中御史中丞許景衡奏乞救援順安軍疏曰臣伏
觀順安軍為金兵圍城危急奏乞差軍救援并乞糴買
本錢未聞朝廷措置施行又二狀為久闕正官亦蒙批
送吏部依條差注竊謂邊奏告急乞兵救援及糴買糧
草正在朝廷疾速應副豈可頃刻濡滯也極邊州郡方
當軍興係是重難去處今闕正官亦須破格立賞然後
人肯注擬若令吏部依條差注亦恐人不願就也竊聞
河北並邊州郡若安肅廣信皆已陷沒唯有順安尚能

固守不屈此宜朝廷特加獎勵若有申請尤當疾速施行今來二事或如常程文字或只付之有司不蒙特與措置朝廷果欲棄河北耶又本軍所奏城中芻糧向盡只可支持一月度至今日恐已不能固守無得諸道路之言順安近已殘破若果如所聞則亦已矣不然更望睿明詳覽本軍所奏下三省樞密院疾速應副人馬糴買本錢及措置破格差官填闕免令一城官吏生靈盡為強寇殺戮驅虜也

景衡又奏乞備江岸把扼劄子曰臣契勘方今駐蹕淮
甸而大江上流所當設備雖真州已有范瓊一軍其向
上宣化渡和州烏江與江西金陵馬家渡采石相對並
是險阨去處各合立寨柵脩戰船置水軍精選巡檢閱
習弓弩以戒不虞只如前日張遇羣賊順流而下若泐
江逐處皆有守禦之備亦豈能使據金山梗絕江渡耶
覆轍未遠後患可憂伏望睿旨行下所屬相度前項險
阨去處增置巡檢水軍及守禦之具亦思患豫防之意

也或恐臣所聞關津未至詳盡則乞所屬從長講究施行

三年趙元鎮上奏曰臣伏見比來臣寮上殿奏陳利害并羣臣應詔條具及二府大臣延見賓客獻陳已見江淮監司郡守前後申請防秋要切之務不過控扼上流防托淮甸固護江浙一帶自四月迄今百有餘日慮之固已無遺策大率以兵為先而分兵固守占據地形習熟其山川險易之宜以為出入邀襲之計要在前期而

遣則軍行從容民不駭愕今已秋矣未見分兵而出也
一旦邊報有警敵騎南來風勁馬驕倏至泗上則淮甸
震驚聲搖江左陛下其能安居於此乎或謂俟杜充至
然後分遣今道路梗澁充若久之未至終將不遣邪僮
預為撥發各使按堵俟充之至盡以付之有何不可自
來出兵例皆留滯今日上畫一明日請器甲今日支借
請錢糧明日散起發犒設般挈老小編排舟船動有十
日半月之事比至按隊渡江各到屯泊去處又須旬餘

非可傳箭而集舉鞭而行也待其有警而後發不亦晚乎是時上下惶駭軍情憂疑將有去留嚮背之意安在其為控禦哉若以謂淮甸上流自有兵將分擘已定不須遣兵則幸也苟或不然臣實憂之後時之悔其可再邪臣願降旨開具上自荆襄下及楚泗屯泊地分所屯兵馬大將謂誰置司處所先聲後實未必皆然多作條畫揭示一榜姑以安士民之念亦使敵人知吾有備所謂伐謀也

元鎮又論防秋利害上奏曰臣竊惟東晉之遷國勢微弱惟其設淮上之備以嚴外戶扼荆襄之要保有上流是以能建都江左歷年之久今車駕駐蹕建康則荆淮之防托汭流之斥候誠為急務斥候之不明以措置不專勸賞不立也自來委之軍中及汭路州縣而軍或散亡城亦自守倉皇阻絕力所不暇今欲自御營及諸軍州縣各選募使臣兵級立定人數信賞必罰不任出戰城守之責專令探報如此則人得盡力而事不失實矣

防托之不謹以事出倉卒不能預備也自來俟有警急乃始調發而陣未成列兵刃已交退無所歸披靡逃潰今欲前期選閱受成而出各使分擘遠近占據形勢習熟其山川險易之宜以為出入邀襲之計廣積芻糧嚴設塹柵出而掩擊入而拒守如此則前有以阻遏而後能牽制矣雖然防托之任正惟其人未得其人計將安出臣竊謂黃帝時諸侯相侵伐暴虐百姓於是習用干戈以征不享然而遷徙往來無常處以戈兵為營衛所

以能戰炎帝伐蚩尤逐葷粥以去天下之不順者今陛下欲久留此耶願如臣所陳謹斥候防托之備慎將帥委任之選保無後患堅守不動為長遠之計可也苟或未然則維揚之禍可不鑒哉臣願陛下深懲既往之失常為去就之謀以六宮所止為行宮以車駕所至為行在吏部注授並依八路戶部金帛貯之諸州凡宗廟祭祀禮文法物及六曹百司之間慢者並歸之行宮而差除陞擢號令賞罰出於行在隨駕之兵不在多選擇萬

餘以備儀衛其餘兵將分布江淮預設控扼既有以分
軍食又有以相應援行在官兵既省則用度易足進退
簡便或駐江浙或臨淮甸延見父老省察風俗旌別善
惡搜揚人材召集軍兵振耀威武使敵人知有預備而
莫測巡幸定居之所則恐未敢再謀窺伺然後別遣能
臣出使關陝收六郡良家子募為効用優諸路弓箭手
足其闕額以至蠲私田之稅如弓箭手法推之全陝諸
郡因其民俗復唐府兵之制待以歲月訓練精熟則四

方之事庶有可為者且關中四塞之國周以龍興秦以虎視漢高祖所以卒能并強楚成帝業者以其先得關中之地是知古先帝王欲大有為於天下莫不在此今固未可幸陛下它日圖之

紹興間元鎮又上奏曰臣契勘即日防秋是時臣雖夙夜惕厲思所以廣為隄備第念事勢相形利害安危固有緩急輕重儻非先事建明遠瀆聖聽恐一旦措手無及恭惟清蹕見駐臨安二浙閩中為近輔江東淮甸為

要藩自行朝達鎮江建康屯宿重兵無慮十萬距京師約三十里非不深且遠可恃以安然江西一路北際陳蔡廬壽西連潭衡荆襄比他路邊面最為濶遠偽齊見遣兵將力守光州為備數年頗聞農種漸廣自汴由陳蔡至光纔三百里復與蘄黃接界亦粗有糧可因臣策偽齊萬一會合金人再來南侵當數路並進而鎮江建業既已有備必由光州直擣蘄黃旬日便到江上虜船造棧乘間南渡聲搖江湖人心摧於傷弓當鳥驚魚散

支吾不暇將見行朝亦不得奠枕則建康鎮江雖屯重兵固已無益於事矣況已酉冬敵騎已嘗出武昌岸徑趨興國緣山疾馳數日傳洪州城下前車之戒未遠則江西今日利害安危豈不重且急乎臣計本司見管軍馬共一萬六千餘人皆是招收烏合之衆除輜重火頭等外可使出戰僅及萬人才足以屯防近裏州縣隄備盜賊豈堪前當大敵近奉聖旨留岳飛全軍先分萬兵駐九江士馬精勁似可倚仗臣愚見尚有二患邊面濶

而偽境近則師不可不益師旅增而贍給廣則財不可不聚謂如江州興國軍西抵岳鄂皆據大江上游曲折千里控扼要害受敵處多自潞浦以上江漸狹隘至霜降水落則一箭可及一葦可航非若下流深濶多阻未易侵越也今計岳飛兵數二萬一千有餘除火頭輜重守寨疾病人外實得戰士一萬五六千人忽有警急迎敵保城臨時應機猶恐分布不給兼岳鄂人馬無多安能使犄角應援臣欲乞朝廷更摘那數頭項堪任出入

將兵時暫付臣相兼使用又本路州縣屢經兵火殘毀
繼以連歲討賊大兵往來民力彫弊官用空虛今既留
岳飛全軍復丐益師則軍儲愈窘若止仰漕計必致闕
誤臣欲乞朝廷廣行支降錢物及就撥本路應于諸司
上供錢帛并權貨務見在及日後收樁之數並行付臣
幹旋相兼支遣仍乞選戶部官一員前來與漕臣協議
應副庶幾兵勢稍強財用粗足可以待敵且免臨時擾
攘失措之患臣材識庸暗所見止此伏望聖慈察其勢

迫計窮早賜睿旨詳酌施行

元鎮又乞下湖北帥司隄備賊馬上奏曰臣昨據本路制置使岳飛申諸處探報李成劉麟會合金人有直趨蘄黃渡江之計臣以本路正當衝要控扼江浙實係行朝利害不敢隱默節次具奏庶幾中外預得為備不至倉卒失措自十一月二十日已後探報少緩而臣不即以聞者以敵情不測萬一所傳不審有失隄防或致衝突之患當料其有不料其無勿恃其不來恃吾有以待

之也今李成尚留漢上雖未聞追襲之耗而經營襄鄧用意不淺蓋輕兵追襲為患速而小占據上流為患緩而大計朝廷已有措置非臣愚慮所及緣上流既失即自漢陽而下沿江諸郡皆順流可至之地不可一日弛備非特防秋而已臣已奏稟乞支降錢物打造戰船不唯本路合行計置竊恐沿江諸路亦當如此無聞光州順昌府各儲糧十數萬今則未見動息觀其意向必有所用臣除不住移文制置使岳飛及本司所遣兵馬遠

布耳目益嚴防守并召募硬探直往襄陽已來伺察敵情外所有漢陽沌口係漢江下流湖北帥司所隸更望聖慈特降睿旨嚴切戒約過為隄備庶免意外不虞之患

紹興初監察御史明橐言湖南邊郡及二廣之地舊置溪峒歸明官比年寢廢其員及諸州措置隘砦闕人把拓又令管押兵夫素不習知法令率貪婪無厭況管押又皆鄉民甚為邊患遭困苦折辱者往往無所赴愬議

者欲俾帥臣籍其姓名每三年一遷易如州縣官故事
或云止循舊添差并罷管押兵夫宜令二廣湖南帥臣
處置適宜無啟邊禍以害遠人

四年六月張浚論敵情及備禦利害上言曰臣聞山東
警報曉夕深思未見敵人大舉之意臣竊惟世忠進兵
淮上號稱十萬劉豫父子勢已窘蹙必多遣偽使求援
於敵向使敵之大兵外示衰弱養銳不動秋高馬肥一
舉而至淮甸是為可憂然其勢亦須再調生兵發發百

姓方敢深入何則去歲失意而去人心離怨苟非增益重兵安肯輒至也今我師自屯淮楚偽地騷然修城郭起丁役設馬柵運糧餉蓋劉豫欲以安其民人使無背叛之心凡此皆臣之所樂聞而深喜者比又報敵之大兵已至沂州臣所未喻借使有之豈不為我之利乎夫盛夏興師中國所難敵人為之其失多矣敵之所恃者馬方此大暑不獲休養則秋冬安可復用此一利也敵以騎射為能當夏之時筋膠解緩豈能害物此二利也

北人性不能熱堅甲重兵皆非所用之時此三利也為
我之計正當休兵持重日為過淮聲勢困弊其人仰惟
陛下聖算神機必有所處臣愚無識知豈能測度姑叙
所見恐或有補聖慮萬一區區僭冒伏幸睿照

高宗時浚又論戰守利害上言曰臣智識暗陋所見不
明惟有愚忠庶幾仰報僮或畏避隱默負愧天地誠不
忍為臣竊惟敵人盛夏舉兵拂天違時朝廷發明詔議
征伐固天下所願者臣愚以為今敵竭國而來其勢方

銳可以計圖難以力破若速於用兵則戰有勝負時有利鈍糧有繼絕曠日持久變生不虞曷若俾諸帥結從連衡於近淮要害之地據利便擇形勢就餉運以促其勢堅壁清野時遣間諜坐觀釁隙使之進不得決戰守不能久聚俟其智力俱困而圖之天下可定矣帝王之師以全取勝貴謀而賤戰正今日之先務也惟陛下察大易不密之戒矜愚臣憂國之私斷自聖意天下幸甚浚奉祠居永州論和議利害上言曰臣於正月十五日

恭覲大需之頒再三熟讀通夕不寐翌日作書呈參知政事孫近大槩以敵若尚強和安可信其勢遂衰和為可惜竊料聖心高明姑且為此內以激將士之憤外以觀敵國之情不然事日委靡何以立國燕雲之舉其鑒不遠他日之悔復何可追臣愚區區過計竊以謂敵自宣政以來挾詐反覆傾我國家蓋非可結以恩信待以仁義者今日事之虛實姑置未論借令敵中有故上下分離天屬盡歸河南遂復我必德其厚賜謹守信誓數

年之後人情益解士氣漸銷彼或內變既平指瑕造隙肆無厭之欲發難從之情其將何詞以對顧事理之可憂又有甚於此者陛下焦心勞慮積意兵政精神感格將士漸孚一旦北面事敵聽其號令游談之士取功於一時勲績之臣置身於無用比肩宥密接武求盟小大將帥孰不解體陛下且欲經理河南而有之臣知其無與赴功而共守者矣矧夫敵計莫測自古所傳異時策馬渡河風塵畢起倉卒之間孰肯赴敵蓋自堯舜以來

人主奄有天下非兵無以立國非武無以定亂國立而
勢起亂定而治生然後干戈可戢道德可行未聞委質
強鄰可以削平禍難遠而石晉近而叛豫著人耳目歷
歷可想夫中原之地未易輕守也譬諸人身至虛風邪
乘之手足偏廢不能運動必其精於自養元氣日強氣
之所到肢體乃舉藉外物以扶持難乎其經久而及遠
矣昔魯仲連不欲尊秦為帝且曰秦無已而帝則將變
易諸侯之大臣彼且奪其所不肖而與其所賢奪其所

憎而與其所愛彼又將使其子女讒妾為諸侯妃姬處
梁之宮梁王安得晏然而已乎蓋小之事大不幸而交
於虎狼無道之國彼力屈則姑且矜容力強則肆為吞
并春秋之時楚懷王入覲于秦一往不返逮今千載之
下為之痛心由辨之不早也漢高祖起兵之四年侯生
侍太公呂后以歸軍皆稱萬歲已而羽解而東歸漢王
引兵西歸張良陳平諫曰今漢有天下大半而諸侯皆
附楚兵罷食盡此天亡之時不因其機而取之所謂養

虎自遺患也漢王從之古人爭天下必審夫機會時不
再來追咎莫及高祖知羽之寡恩少義其和不可恃也
又知夫從我將士日夜望尺寸功求其顯著人心之不
可沮也故雖再敗固陵甘心不悔茲二事者足以為今
之戒矣臣日夜思念此國之大事也陛下獨不與二三
將帥熟謀之而從約之遽肆赦之速用世儒之常說答
猾敵之詭秘措置失叙思之寒心臣不自量為陛下再
計嗣今以往使其遷延生事姑緩一時謝絕使人可也

明告以利害詳喻以曲直可也萬有一如太公呂后之歸便當博詢諸帥獎礪將士外存和議之名內圖恢復之實逼之以大勢使其人心終至於乖離示之以威武使其內疊不能以遽息始臣而終服之如唐太宗之所以待頡利者庶乎國家可立焉臣罪戾之餘一意養親深不欲論天下事顧惟利害至大至重不忍緘默以負陛下之知罪之聽之惟陛下命

紹興間戶部尚書章誼乞守臣措置土豪狀奏曰臣竊

聞劉光世奏金人忽生南渡之意又聞通州使臣劉鑄
奏金人來年正月初一日渡江又聞江陰軍探報北岸
有船數千隻臣參驗三人之說則金人南渡之計決矣
蓋金人去歲嘗以冬月渡江矣陛下御輕舟乘風遵海
而南彼方崎嶇山陸當建康屢戰之師踰錢塘城守之
阨且復再涉重江是以追兵不得以速進也今時則異
於此矣大駕駐蹕會稽北直通秦彼將方舟結筏徑渡
三江之口騎兵舟師水陸無進又自立春之後風起東

方海行之舟有類退鷁覆却可慮敵誠出此則我之所
保水失乘桴之便陸有追騎之虞墮敵計中矣臣以是
思之則三人之報不可忽正月之渡為可信不知朝廷
亦嘗慮此乎使三人之報不實則大幸矣使其不妄則
正旦逼矣將何以待之耶臣聞臨安府守臣李光願統
浙西土豪為國屏翰朝廷何不聽用其策稍假事權使
勵其衆藉為禦侮非唯臨安一府也二浙諸郡江東江
西一切委自守臣速行措置明降詔旨喻以力戰堅守

之意降去退保之令有能竭節城守扼險破敵與夫懷私退避並緣為姦之人來年事平之後大明賞戮如此則金人雖欲南渡有所不敢設其敢渡諸郡之兵且戰且守或犄或角日夜追逐數萬之衆可立盡也一戰而勝敵人終身懲艾陛下國勢立而疆土復矣臣不勝區區愛君憂國之誠惟陛下留神聽納與將相大臣速圖之

誼又乞令張浚措置防秋然後班師上奏曰臣聞江淮

招討使張浚之師自破李成斬孫建馬進之後盜賊震
恐知尊朝廷如張用孔彥舟之徒皆願聽節制乘此機
會可以措置江湖淮甸之間使兵皆隸將帥使將皆有
職任分布要害之地委以戰守之事各令漕臣給其糧
餉嚴罰重賞責以來效如此則防秋之事大槩略舉矣
然後張浚可以班師別聽陛下之指授今聞朝廷許之
入覲徑自淮西循江而下竊恐奉詔遙歸其於江湖淮
甸之間有合措置事務不暇經略則數路之廣盜賊復

得屯聚軍兵無以彈壓雖留岳飛一軍以為聲援終恐兵少望輕緩急難濟伏望睿明更賜裁酌不勝幸甚

誼又論守江之策上奏曰臣近者伏見朝廷分三大使宣撫淮南湖北之地皆跨有大江邊臨淮泗既可以應援東北來歸之人又可以捍禦敵人南侵之勢內資富庶之邦外撫殘破之郡誠計之得也然欲進圖收復必須退有據依今東北方藉經營之勞而江南實為固守之地設使黠敵憑陵盜賊羣聚但不能踰大江而東則

國勢鞏固如木之有本水之有源崇高廣大可坐而致
臣去年為郎時嘗為宰相畫守江二策不蒙施用後卒
奔走臣觀今日守江之議尚不可廢輒繕寫投進連粘
在前伏望睿明鑒照如有可採乞降付外廷相度令三
大使措置施行

誼又論具舟師為守江之備上奏曰臣竊見朝廷自靖
康以來聚天下之兵以抗金人初戰燕山次戰太原初
守汴京後守淮向然而守則不堅戰則不利累年於茲

矣至于今日知步騎之非敵懼易野之難守是以東踰大江保茲川險勢雖甚迫而理實可安朝廷所以屈體為此者謂金人利於鞍馬而南方長於舟楫使金人捨其所利而我得用其所長則勝負有在是朝廷之本謀也今則不然專恃長江之險不設舟師之備萬一金人東侵方舟結筏皆可濟師舉帆直指如履平地則向之川險既不可保而南方之所長亦不獲用日蹙一日將安所之乎且朝廷之所恃者北則淮南則江今縱不能

守淮且欲阻江為險則舟師不可不備也今之議者或欲聚兵於江北或欲分兵於江南此議者未之思耳夫聚兵於江北是欲與金人戰也中國既已屢戰而屢北則戰非所利矣又欲分兵於江南者是欲守也長江數千里金人果得浮舟以濟則我不知所守矣故嘗謂此二說皆未之思也唯多具舟師中流以守則金人雖有良將勁兵輕車駿馬數踰百萬亦必臨流歎息而退將安用之伏望招選才能之士多具中流之師則江南諸

郡雖無守備之兵亦可高枕而卧矣

小貼子竊聞金人已有登萊沂密之地萬一自此數郡乘舟而來則通州狼山之險實為咽喉要害之所當有舟師以為備禦温台明越常熟福山皆由

此路以往伏乞照察

誼再論舟師水戰之利上奏曰臣契勘目今朝廷暫駐浙東襟帶江海實憑川險以却敵騎然則巨浸湍流蓋今日之長城也樓船戰艦蓋長城之樓櫓也舟師戰士

鑿工没人蓋長城之守卒也火船火筏彊兵毒矢蓋長
城禦攻之具也設有江城萬里則尺寸之地不容於不
守今有巨浸湍流顧豈可無守禦之備哉守禦之備莫
如舟師用舟師之策莫如中流以守且金人攻城長於
用砲我之舟師中流以守則矢石有所不及金人野戰
長於用騎我之舟師中流以守則騎兵不能奔衝是二
者固可以奪金人之所長矣又況金人將必欲與我戰
乎是必造舟維梁結筏渡騎然後可也造舟結筏不在

大江之濱則無艤駐之地必於大江之澚則有焚蕩之虞若是則進不得戰矣金人將長臨大江以困我乎自春徂夏自夏及秋雨潦將降騎兵有陷沒之憂氣令炎燠遠人有疫癘之苦若是則退不能守矣在彼者進退失據而我中流之師未嘗勞也伏望特賜討論盡發平陸之兵迭為舟師之用並海沿江若州若縣多具中流之師以為守禦之備不勝幸甚

五年房州司刑張嶽上疏曰金人去冬深涉吾地王師

屢捷一朝宵遁金有自敗之道非我幸勝之也今士氣
稍振乘其銳而用之固無不可然兵疲民勞若便圖進
取似未可遽臣竊謂為今日計當築塢堡以守淮南之
地興屯田以為久戍之資備舟楫以阻長江之險以我
之常待彼之變又荆襄壽春皆古重鎮敵之侵軼多出
此塗願速擇良將勁兵戍守其地以重上流之勢

六年知鼎州張翥言鼎澧辰沅靖州與溪峒接壤祖宗
時嘗置弓弩手得其死力比緣多故遂皆廢闕萬一蠻

夷生變將誰與捍禦今雖各出良田募人以補其額率皆豪強遣僮奴竄名籍中乘時射利無益公家所宜汰去別募溪峒司兵得三百人俾皆練習足為守禦給田募人開墾足供軍儲詔荆湖北路帥司相度以聞帥司言營田四州舊置弓弩手九千一百一十人練習武事散居邊境鎮撫蠻夷平居則事耕作緩急以備戰守深為利便靖康初調發應援河東全軍陷沒今辰沅澧靖等州乏兵防守竊慮蠻夷生變叵測若將四州弓弩手

減元額定為三千五百人辰州置千人沅州置千五百人澧州靖州各置五百人分處要害量給土田訓練以時畊戰合度庶可備禦以所餘閒田募人畊作歲收其租其於邊防財賦兩得其便可為經久之計詔從之

八年提舉臨安府洞霄宮葉夢得奏金人移軍稍前乞講民兵水軍二事劄子曰臣聞淮寇尚未覆滅近者復移屯稍前有欲戰之意道路所傳未知虛實臣嘗論自陛下決策親征逆折其鋒意其雖有奔突之志無所可

施者以為王威既振雖凶頑無知成敗所在自當知難而退今乃昏迷尚懷搏噬臣伏思之蓋敵法甚嚴彼既受命萬里入寇暴師三月傷折已多若無功而還總帥者必不免刑戮故欲竭力以戰以決去就若僥倖小勝固可以藉口或遂敗衄亦足為辭此姦謀所從出也不然知我有備請命於其首欲歸而不獲尚徇往時兇暴之氣責之深入懼而不敢不前又其不然則是欲引去畏我躡其後張此虛勢以為陰遁之計耳果出於前二

者則不可不過為深防臣聞兵法曰上兵伐謀又曰兵家先聲而後實今朝廷拒敵必勝之策既付之諸將矣備禦之道凡脩其實者宜無不盡故臣不敢復言而前妄議民兵水軍二事雖若迂緩區區之意蓋謂施之今日則足以廣先聲而伐其謀與平時議者不同試復申之所謂民兵者孰不知驅畎畝耒耜之徒使捍虎狼不可禦之敵為不可哉且方此擾攘之際又重勞吾民亦不能無擾然臣非欲恃此以為戰也蓋兵有以多為用

者古者用師必設疑兵則增大其勢惟恐其不盛苻堅
犯晉望見八公山上草木皆成人形猶足以懼東漢虞
詡謀武都羌至有添竈日增倍之以示彊今傍江之人
利害既切於已往往不待驅率私自結約保守鄉里者
所在而有州縣把隘防托及給軍役之類亦皆出於保
伍莫非民兵也所患者特無所統一散漫雜處而敵不
知故臣願權暫命官因以部伍團結為之紀律番次迭
出耀之江上與正兵相為先後豈不愈於望草木而示

添竈乎一可示敵以衆張大吾軍二可增吾正兵之氣
相為形援三則布列旁遠之地萬一衝突出吾不備亦
愈於無人今敵已師老必不更能久留不過為旬月之
計農事未興民未必告病也若水軍則諸大將所統固
各有之矣臣竊慮其以步騎兵為急而未盡講或置而
未用或不常閱習或彼此節制不及緩急不相為用則
雖多而無所益故臣亦欲會而為一及官私舟既未通
行亦可權時拘截專為一軍於建康鎮江兩州沿江要

害之地分布擺拽俟其欲用則與騎步兵合謀並進日者偽四太子回軍至吳江裨將陳思恭驟以舟師襲之敵衆驚亂幾至於潰適近村有應之者素非所約思恭疑為敵兵遂不果終其役若使軍有所統晝夜講習號令方略進退闔散悉皆預為約束一則可以示敵使知畏有加於前二則事藝精熟入日從事其間安於為用三則可擇驍勇之士伺敵之間乘風水便利以收奇功蓋敵既與我夾江相持其要在江則水軍為上騎兵次

之步兵又次之尤當深察也今敵如止為陰遁之計稍已退却臣言固無所用如尚猖獗志在衝突則將步騎正兵外更益之以此恐或可以佐萬全臣不避狂愚復畢其說更望聖慈裁擇疊冒天威臣無任激切屏營之至

高宗時夢得為兩浙西路安撫使乞措置瀕海州縣防秋狀奏曰右臣備員一道兵民之寄當朝廷艱難之時外難未平所仰四方相與維持者其責尤重不敢偷安

尸素苟且目前故自到官以來日夜盡瘁庶幾稍有寸補不至上誤使令竊見金敵雖已遁去包藏禍心游食上國之意恐未遽弭登萊兩州密邇其境而兩浙諸州例與海道相連自登萊航海遠不過數日可至浙西諸縣如杭州鹽官秀州華亭海鹽常州江陰平江府崑山常熟浙東諸縣如越州餘姚上虞明州象山定海奉化昌國温州樂清台州寧海黃巖皆切近於海臣去歲守南京嘗得宣撫司探報聞敵欲取山東路入兩浙作過

是時彼方有意再犯王畿勢固未暇及此然又見其未嘗無此謀也近有東道總領司嘗被驅虜使臣歸為臣言敵知其為兩浙人頗問山川道里形勢甚詳又其所誘留人多有東南篙工水手從事舟楫之間者皆為陳說計策及夸大蘇杭富實臣益知敵人貪婪之心不無所在今兩河蹂踐之餘內至近甸金帛子女掠取殆盡使其谿壑之欲誠未厭足則去歲宣撫司探報豈得不慮哉兩浙風俗輕而易動有自來矣又連遭方臘倪從

慶之變人懷危疑常不安居加以險僻頑民陰間伺隙潰散冗卒居多嘯聚樂禍喜亂未易制御今環兩浙之地瀕於海者十幾四五議者謂敵以鐵騎衝突為長澤國水鄉非其便利此以其竭國來寇論之可也若志但在金帛子女則姑以千百之衆脅吾驅虜之人以為鄉導聲言欲雜出於數州之間以圖侵掠則未至而吾民先已驚遁矣況樂禍喜亂之徒望風乘勢或應之以合謀或假之以自奮則其憂有不可勝言者何必直須敵

之盡至乎晉之孫恩竊入上虞唐之袁晁發自臨海近日方臘山谷一夫亦能破六州二十七縣皆已事之驗然所以為備禦之策不過城池器用兵卒糧食四事而已今防秋僅有兩月事勢已迫每事必俟朝廷措畫則勢不及待所以分憂捍患盡其力而為之惟在守令而未見其可當此任者臣雖誤當帥事法有常守又浙東非所部不敢輒有侵越若遂拱默不言緩急或有誤事雖即誅死何足償責輒敢冒昧陳列欲望聖慈詳酌特

降睿旨先次遴擇瀕海諸郡守臣各得其人分命監司徧行巡察及諸屬邑凡令長有不可委仗者許得權宜移易罷黜別加選辟量立賞典以為激勸應所合指畫事除城郭已有近降指揮外其餘如脩治器械訓練弓兵皆嚴為近限責以實効無令文具僻遠之地巡尉與弓兵或可增添元額許一面差補將來如有調發須量以分數存留無闕守備錢穀移用亦當樁管應用無至侵奪至於分布防托之宜闔散戰守之節斥堠幾察之

要鄰比應援之期皆須熟議素講預有一定之謀相為表裏平居持重鎮撫不至於勞民有警隨事酬酢皆可禦敵軍聲士氣稍達於海外使彼望而知畏而吾境內之姦亦有以逆折其心而不敢萌則遠近人心恃以不恐朝廷亦可一意西北而忘東顧之慮干冒聖聰不勝惶懼激切屏營之至謹錄奏聞伏候勅旨

夢得為江南東路安撫制置大使又論防江利害劄子奏曰臣聞兵有可勝之理而無必勝之道孔子曰我戰

則克夫以至仁伐不仁孰敢與為敵此理之所可勝者也然猶曰必也臨事而懼好謀而成而不貴盡用其勇者無必勝之道也故堯舜伐有苗而至于三成王周公征淮夷而至于四雖終至於克服殄滅然其初猶有待而後成者蓋不以所可勝決其所必勝聖王之功也伏見黠敵敗盟罪惡已盈天地所不能庇覆鬼神所不能容忍陛下謙慎寬慈包藏涵養之久至使溢而自覆玩而自焚今猖獗以來攻城無所得掠地無所據烏珠

新敗亡而去諸將偏師所指捷奏交上是誠滅亡送死之日也秋期已至我所可勝者雖其理甚明然敵人姦詐用意不測其為必勝者亦不可不審臣誤蒙聖恩總帥一道留鑰所寄王室是賴敢不思効其職竊惟今日之計不過有三其大曰過河次曰戍淮又次曰保江日者既命四大帥以三京兩河招撫招討矣若乘此屢勝之後敵果沮撓我師分道並進直抵京師追逐過河遂定故疆何往不可若猶恃其烏合之衆濟師於國竊據

京師閉關旅拒乍出乍沒我不可盡鬪吾民則諸帥分屯淮上徐觀其釁我既未敢直前彼亦未敢遽下者必且戍淮若昏迷不悟尚懷衝突竭國遠來無所忌憚我師未可遽與爭鋒則退而阻險以待其師老力疲然後為之所者必且保江過河不可必而戍淮戍淮不可必而守江此勢所不得已在我未為失策也至於保江則盡矣江若不必守則後何以繼乎天生巨險所以限南北非河與淮之比曹操之彊孫權首敗之赤壁其後權

徙治秣陵操復連年再攻濡須權至以水軍挑戰卒不
敢發徹軍而還及其子丕遣曹休張遼等併軍同下權
遣呂範等以舟師拒之三年丕出廣陵望而歎曰魏雖
有武騎千羣無所用也乃退後魏拓跋珪南侵止於朔
翔淮上惟宋元嘉末一至瓜步壞民廬舍及伐葦為筏
聲言欲渡亦睥睨太息而不能越則江豈有可犯者乎
惟是漢末劉繇守曲阿畏懦無能故為孫策乘之長驅
奄有三吳與近歲杜充陰懷異志擁衆數萬散而不屬

以誤大事爾竊嘗考之吳所以能禦曹丕宋所以能禦拓跋珪者無他術焉臨江為疑城自石頭至江乘築圍作薄落上施假樓浮之江中使魏人遙望知畏者權之策也盡戶發丁分守津要使之遊邏上接于湖下至蔡洲陳艦列營周亘江瀕自采石至暨陽六七百里者宋之策也則知險不能自固古之為守者初無竒秘不可及之事我之人力勝而彼不能奪彼之人力勝則我不勝守而所謂人力勝不勝者在其所施設用意不用意

之間而已故臣竊不自揆妄意今過河之策朝廷已付之將帥而長江守禦參古驗今使州縣協力講脩其職預為萬一之備者臣之職也敢不以身先之其道不必便有興作但措置有定議控扼有定所上下知所戒而不敢忽遠近知所恃而不敢怠正使敵即掃蕩猶足外為聲援以佐大軍設有緩急皆無逃吾之術內則吾拱手以待其斃可也是以輒敢先事有言昔曹丕既退孫權以情語蜀使曰孤土地邊外間隙萬端長江巨海皆

當防守丕觀豐而動惟不見便寧得忘此復有他圖夫以丕不敢犯為得計而以丕不見便為可虞此孫權之所知也而況於今日乎所有防守職事朝廷前後方略約束案籍具在臣已檢會擇其所當施行者畫一條例別具奏陳而迂踈之見淺陋之識復以冒達天聽伏惟聖慈貸其萬死少加採擇

夢得又奏論舉行保社分守地分劄子曰契勘本路與淮西雖隔大江其實相為表裏自古用兵貴於後重以

為根本所以師出必宿重兵於後今朝廷既以張浚領
淮西宣撫於前則本道正當其後張浚見屯本府平居
固賴以為形勢萬一有警張浚兵起赴所部則本府兵
備單弱便為虛空之地縱或朝廷分留張浚兵防托客
主異勢號令無統理難使喚臣昨紹興初待罪本道郡
人懲王瓊奔潰之失無以自固坐遭剽掠屠戮痛入骨
髓皆願隨所居鄉村自結為保社家出入丁分立隊伍
逃相部轄官為之籍其姓名以待有警則部轄人各帥

其屬分地為守以自保其室家因遂從之略得八九萬人自後敵未嘗犯境官司亦未嘗行今民間以其法久廢皆欲少加整緝臣已漸次檢舉施行外竊緣近世凡言民兵利害者多是以民為兵公家取以為用使之遠去閭里或科率錢物騷動百端徇名忘實徒為重害與此不同自兵興以來江淮之民有逃避不及自結為山寨水寨者多得保全只如本府轄下五縣昨敵人過江皆被殘酷惟句容縣一鄉自保赤山並無侵害故今戶

口比他縣獨多況今不移所居而自為守禦或謂恐因之聚為盜賊亦不然此前日妄亂召募烏合之衆為把隘防托措置無法失其所歸之過今乃土著主戶皆有家產物業使自保其父母妻子安有此慮至於官中初無所費而坐有十萬民兵之名內可以與正兵相權為淮西後重之計外可藉先聲以威敵境此其効不為小補

夢得又奏金人敗盟乞下三大將措置捍禦劄子曰臣

今月二十一日准壽春府探報敵騎侵犯東京前鋒已至拱州應天府未明虛實尋已兩具奏聞續覩淮西宣撫司探報與臣一同并有錄白到偽榜必亦具奏臣竊惟敵情變詐不測蓋有自來昨張通古來使之後雖歸我舊疆朝廷尋遣王倫等報聘既留王倫不遣莫將繼行又不即迎曠日持久包藏禍心人固疑之今果猖獗乃以盛夏弓解馬疲之時遽至王畿其志必是秋冬欲如往年深入觀我所為徐為進退故先入京師休養士

馬復占昨來留下米斛仍因二麥成熟苛歛拘收積聚糧食至秋深長驅南下為必衝突之計若我有以禦之則因所積之糧且堅壁相持萬一我有間隙可乘則鼓行而前惟所欲為陛下聖謀宏遠慎終圖始必皆素有定議臣備員疆吏職思其憂不敢不為過計妄議者或謂敵勢頻年衰弱去夏腹心自相誅戮懼為我所窺故特為此謀以自抗暫至京師未必更能前進我不可為之震擾或以為莫將奉使未回敵欲取我歲幣貪婪

不貲及邀求禮數狂悖非分以我未即順從故以重兵
壓境劫脅以幸得志我始疑之不可便與爭鋒若果出
此則固無足慮我但持重勝之以理可矣如其不然出
我所料之外一旦橫行而我無預備則事至豈可旋為
之謀哉何者敵素有易我之心謂其衰弱則非臣所得
知若邀求狂悖則前已見於事矣安能保其必止於東
京蓋敵之南侵者凡再建炎三年陛下巡海上杜充迎
降諸將數十萬人望風潰散故乘勢得以入浙其易我

者一也紹興五年以劉豫為鄉導再復大入陛下進臨
平江諸將並會雖楊沂中迎敵一戰破之然不能繼為
圖使師老從容得去其易我者二也今不稍更前轍赫
示王威督責中外日夜併手共為及至秋冬尚恐不及
若更少緩使得料我但如平日其氣愈盛其鋒愈銳則
何所不可肆哉臣聞上兵伐謀臣不知敵欲復舊疆朝
廷姑且聽之耶欲堅守以俟則中原兵力寡弱城池器
械皆未嘗料理未可遽與之較若姑且聽之則莫若先

伐其謀亟下中原諸州乘其兵未集盡將見管米斛并
民間二麥特為措置或令般運或令焚棄勿為彼有縱
有不及勝於不為彼所恃者先已失圖我却部分諸將
犄角連衡分據要地示以欲戰之形姑以和議應之佯
為小屈使彼曲我直而內實嚴為守備纖悉周盡今諸
將兵訓練日久各精熟蓄銳思奮人懷踊躍聞敵亦自
知之張皇六師亦先王用兵之術所不能免如敵縱未
即知畏豈不內懷疑阻我益商度軍食分置沿流諸郡

我之所積者日廣彼之所仰者日耗進不得前退不得
守雖欲久留勢有不可而後我或欲優柔涵容尚存和
議以奉迎太母欲乘其弊定與決戰使彼懼而歸我太
母苟出於一無不可行伏望聖慈特賜睿察參酌累年
方略反覆熟議無使我在其術內古者師克在和不在
衆雖有良將苟非同心未易成功漢陳平號智略無遺
方諸呂為變周勃以太尉握重兵猶無以為策得陸賈
之言奉金交歡始能坐勝唐以九節度兵圍史思明於

相州李光弼郭子儀在其間而計慮不同人各自異卒為思明所敗今大兵所恃惟韓世忠張俊岳飛三將臣欲乞朝廷先定大計更命三將各具所見如何則守如何則戰守以何道戰以何術孰當鋒居前孰勒兵殿後如何以為聲援如何以為策應一一條上取所可行者就以付之各盡其謀更相究知以責功效仍下詔慰勉俾務輯睦苟無同異躬率部曲一以社稷為心古之言兵者以謂如常山之蛇擊其首則尾應擊其尾則首應

而艱難相濟譬之同舟遇風雖秦越且無異心況位無將相比肩並立者哉此武王有臣三千人同一心所以勝紂之億萬人也臣智識淺陋不明遠略濫守陪都外固邊圉敢不竭盡忠款少効區區之愚冒瀆天威臣無任惶懼隕越之至

萬得又奏措畫防江八事狀奏曰臣伏見金人敗亡遠遁尚猶竊據東京近者雖諸道收復故疆迤邐漸近王畿秋冬掃滅可待然臣所部控扼大江為國藩籬與他

路事體不同其職守所當舉不敢不過為隄備內以屏
翰王室外為大軍聲援使敵人望風知畏以稱陛下萬
全之舉謹取會本司及屬部州軍自敵人侵犯中原前
後被受朝廷指揮有合檢舉預行講究事其大要有八
逐一開具合取自聖裁今具下項一曰申飭邊備檢會
紹興三年十一月樞密院劄子節文具下樞密院奏諸
路防秋各有屯守養銳蓄力規畫已定奉聖旨令都督
府及諸路將帥加意防守增修邊備精練士卒明審間

探嚴兵待敵勿致疎虞臣契勘邊防之事其目不一雖大號令一當聽稟朝廷然有司之守見於常法自當夙夜上下協力振舉兵法曰善戰者先為不可勝以待敵之可勝不可勝在己可勝在敵不可勝者守可勝者攻又曰用兵之法無恃其不來恃吾有以待之無恃其不攻恃吾所不可攻昔齊師侵魯疆吏來告桓公曰疆場之事慎守其一而備其不虞姑盡所備事至而戰又何謁焉此古守疆之道也然桓公知其說而不能行春秋

書公追戎于濟西說者以為公不能預備戎至而不知
逮其去而後始追之故書以為戒然則為其所不可勝
恃其所不可攻者其可斯須忽乎昨和議之後兵革少
息汭流諸郡例多廢弛畏慎者恐涉生事但保目前怠
惰者竊幸苟安豈思日後故敵兵初聞人人畏駭皆有
遷避奔走之意雖有官守者亦顧望相持及兀术敗走
軍聲驟振捷奏上交則復皆謂江淮決保無事不必更
為過計常情所及安知遠慮夫戰勝者易驕謀中者易

怠常勝之家難與慮敵光武之所深憂竊慮亦合明降
指揮監司守令下及巡捕之官各脩其職常若寇至有
合申明事務以時上聞無得循習坐廢職業二曰分布
地分檢會紹興四年十月樞密院兩次劄子備坐下劉
光世呂祉奏分定劉光世所管沿江地分上流自池州
東流縣管下佛池洲至江州界下流自太平州當塗縣
管下磁姥山接連建康府界皆是光世所管鎮江府承
楚一帶係韓世忠所管續除張俊浙西江東宣撫使本

府界係張俊所管臣契勘本路自池州至鎮江府皆是沿江地分共一千餘里昨來既係劉光世張俊兩軍分守故敵人侵淮甸凡經三月有餘卒不敢窺江岸今來張俊雖屯太平州近者又聞岳飛分兵下守池州略有舊制然逐人既領三京河南北兩路招討將來進師中原逐旋起發前去即沿江諸州並皆空虛都無指準昔匈奴入上郡雲中漢文帝以令免屯飛狐蘇意屯勾注張武屯北地以捍其外而內以保京師者復以周亞夫

次細柳劉禮次霸上徐厲次棘門分要害之地以相表裏唐代宗時吐蕃回紇入寇至奉天以郭子儀屯涇陽分布麾下各當一面以李忠臣屯渭橋李光進屯雲陽馬璘郝廷玉屯便橋以次前拒故皆無患今諸將方圖中原不容更分其餘力無使守江若但令預先以今來地界依舊分畫使有定處如遇進討逆邇追破敵人瀕江自在腹內不必過慮萬一或須退守則引兵而歸各着部分便可堅壁固守臨時不致紛擾故曰善戰者其

勢險其節短紛紛紜紜鬪亂而不可亂竊慮亦合明降
指揮略如前日預行約束張示形勢可使敵人傳聞知
我有備亦足慰安遠民三曰把截要害檢會紹興四年
九月樞密院劄子備坐樞密院奏沿江采石渡罔沙夾
馬家渡一帶分命劉光世韓世忠各遣軍馬擇地屯泊
各有差定兵將住泊去處後來韓世忠移屯鎮江府續
差張俊策應兩路其本府靖安石步至東陽下蜀接連
浙西亦係張俊差定兵將住泊去處臣契勘本府及太

平池州三處戎馬可以過處甚多前件所具止是大略
今據取會到太平州界內即有荻港渡三山大信渡等
池州界內即有丁家洲楊山清溪李河鴈汊趙屯港口
等皆是自來置巡檢緊切守把今所管土軍每處各不
及百人其餘不置巡檢猶有二三十所既不可徧守亦
須量度地里遠近於其要會別行屯戍使緩急上下應
援得及則力不足者知所倚仗昔蘇峻作亂自和州渡
江孔坦勸王導早守江口陶回為庾亮言峻知石頭有

重戍不敢直下必向小丹陽南道步來亮不能從峻果
由此路徑至都城其後諸將戰不利郗鑿度賊必入吳
即於丹徒立大業曲阿虔亭三壘賊果來攻大業不克
而敗其地今皆在本府及鎮江界內可考而知蓋攻其
所不備兵之要務以此推之凡可衝犯豈可不防杜充
惟不知此故雖有數萬衆聚而為一初無部分向着
一且望風奔潰今日安得不戒竊慮亦合明降指揮下諸
將及守臣逐一相度凡可過渡去處擇其緊慢或兵或

民預定戍守之所以待臨時分撥為決不可犯之計以防意外之患四曰約束舟船檢會紹興三年十月樞密院劄子淮東安撫司申明已責委江都泰興兩縣約束沿江鄉村人戶遇有戎馬緊急預行搖駕舟船離岸等事令沿江州縣依此施行臣契勘長江之險非黃河與淮之比河淮不唯皆狹河峻急所向不可當淮水淺而易涉獨江勢深濶平緩自春秋劉項以來齊楚燕趙用兵越淮與河皆浮梁可濟未嘗深計至長江惟孫策乘

漢末亂離無與為敵故能乘間長驅徑入三吳及蘇峻
狂悖掩晉不備遂抵都城自孫權定都秣陵之後逮晉
宋及梁自北來犯者苟有守備皆薄江而止莫敢睥睨
中間雖曹操嘗至濡須曹丕嘗至廣陵魏太武嘗至瓜
步亦逡巡顧視反不敢輕進況今烏珠之衆乎守禦之
計未論其他但能嚴斷舟楫箴筏彼自無以為計今可
乘以渡者非止舟楫其木筏與蘆荻柴束皆可用公
私舟船固不可以數計而商販木筏類皆聚于北岸真

州所在山積蘆荻亦是出產去處若便行禁止則有騷擾之弊若緩急旋圖則勢必無及惟當先命有司籍見公私舟船數目曉諭遇有緩急則許令所在一面拘收盡過南岸不惟可絕敵人劫奪占據若或不得已至於水戰則舟皆吾艦人皆吾兵不必更廣製造及別籍水軍真州木筏蘆荻並限以八月前盡數發入鎮江及浙西其江州向上木簾八月後並權住不得放下已過者候到本府盡令解拆竊慮亦合明降指揮重立刑禁責

付守臣收執以待臨時施行但嚴禁無故輕舉阻節往來人自不擾五曰團結鄉社檢准紹興五年樞密院劄子具下樞密院奏節文內召募土豪鄉兵把隘奉聖旨
沿江州軍守臣逐路宣撫安撫司疾速講究其土豪鄉兵並先行籍定人數以備緩急使喚即不得因而勾集致有騷擾至紹興六年六月樞密院劄子坐下臣寮上言緣諸路帥憲司夏秋之交不復詢問有無盜賊循例檢舉於界首各立寨柵聚集保伍因而決撻妨廢生業

遂降聖旨除沿海地分外其餘州縣不得亂有勾集臣
契勘自古兵民皆有所統周官在民者五家而上謂之
比閭族黨在軍者五人而上謂之卒伍師旅同出一法
此雖常談然用衆之道未有散而不屬能號令開闔者
也今軍固有部分行伍而民之在鄉村者亦有保伍在
坊郭者亦有保甲但承平日久未嘗資民為用故施之
不過租稅盜賊之間而已軍興以來士不知古一變而
為鄉兵之論於是遂欲驅農畝耒耜之民與正兵參用

不教而責之戰無事而聚之役食無常廩用無常器朝廷既不得已從之遂致人言因有再降指揮竊詳詔令但戒不問有無盜賊妄亂勾集若所當用豈可因噎廢食今所謂團結者非民兵之謂也特以保伍舊法少加損益令自相糾率各集強壯推擇所信服以為首領官為立條約假借名目約見在多寡之數籍而不用揭以示衆無事但藏其籍有警按籍下令各守其地正兵控守之餘令彌縫其所不及外張聲勢以自保其鄉里而

已民雖至愚若懲往歲之弊不幸寇得踰江強者奔迸
遠徙骨肉離散弱者坐受殺戮同於雞犬資用剽劫室
廬焚蕩孰若上下相維各奮其力使不得犯我之為愈
乎民能保其土則國能保其險理之必然者也周制用
民不過一人以餘為羨卒至田與追胥尚猶竭作宋文
帝禦魏太武盡戶發丁雖公卿子弟亦皆從役此雖不
可為法亦可見其所以能自全者竊慮亦合明降指揮
許令守臣預行計論量為措置以圖民利上佐國勢有

蹈前失重寘典刑六曰明審斥堠檢准紹興四年十二月樞密院劄子勘會斥堠全籍寅夜舉放煙火務要不失捍禦昨劉光世在池州駐劄將管下沿江地分並置烽火所有建康府浙西沿江一帶並無烽臺斥堠奉聖旨令江東浙西安撫司措置施行臣契勘用兵斥堠不惟敵勢厚薄軍行遠近所待以前知無亦慮姦人唱為浮言動搖民聽遠無以驗或致有悞朝廷設施晉表耽守歷陽石季龍遊騎十餘匹至耽遽以為言遂至朝野

危懼王導以宰相假黃鉞出征已乃知其妄石勒在葛
陂軍士飢死亡過半至有勸之納款者元帝會天下兵
守之而不知乃縱使去後遂不可復制此斥堠不明之
過也昨建炎間敵騎已至江上本府守臣猶誤以為李
成遂至失守斥堠探伺條目固多烽火最為緊急魏王
基攻西陵為今峽州孫權遣戴烈陸凱拒之暮舉火西
陵鼓三終達吳郡古之用兵蓋如此今敵人近在東京
瀕江相去無數百里其動息尚不能的實盡知日近攻

圍順昌前後累戰多是事已方得關報至今人數多寡
議者猶有異同則緩急何以取信所有傳送違角比者
戒約雖已嚴然事待奏而後知亦恐緩慢至於間探亦
須所在嚴立賞罰廣布耳目相與參照非臣所得獨與
惟是烽火本府昨自承指揮上元江寧句容共置烽臺
三十餘處通連浙西不為無補今大軍屯泊淮上與前
日事體不同淮北動息尤宜速聞舊制沿邊三路烽火
皆有成法人多知之若令更加條具取其簡易可行者

付之於外遠近同為一體不至乖悟竊慮亦合明降指
揮令自淮南廬壽以來增置烽臺通江南岸舊管去處
專委郡縣候戎馬警動即舉以施行七曰措置積聚檢
准建炎四年七月樞密院劄子檢會三年六月聖旨節
文鄉村居民自來顧戀產業若必行清野之法竊恐盜
賊未至民情先搖若置而不問又恐佐敵資糧反為民
害仰守令監司更切措置多印文榜直說事因使民間
通曉務求安全外有糧斛草薪之類難於般移亦須預

行措置臣契勘敵人前後侵犯敢肆深入皆是資糧於我故恬無所憚昨自偽立劉豫之後盜有土疆認為已有其抄掠劫奪取之於民固已有限與前不同是以紹興六年至於淮甸無成而歸亦坐糧乏自困之一也近脩和議中原諸州積糧甚多皆是賊豫苛歛裒克以為猖獗之備可見姦謀臣初聞警即嘗具陳請首欲措置蓋正為此今來從偽諸郡以次收復倉廩所餘無幾淮北雖近秋成本不產稻將來為我師過淮之備縱敵得

之不能般輦前來亦不足計惟有淮南地分水田尚多
今秋所入安得不預圖善用兵者不必全抗以力劉項
相拒滎陽成臯之間必計教倉得失陔下之敗正以彭
越田橫往來絕楚糧道張良陳平知其食盡以為天亡
唐初羣盜紛起亦倚洛口諸倉為重事之利害彼此均
同我欲討彼當須先講糧道則彼來侵我豈能無食可
全所有淮北地分將來準備大軍進討合用糧斛有司
自宜別有措畫其淮南直至江岸廬壽滁和皆前日敵

人宿師之地若能依險自為山寨之類即趣令各擇利便早定其所般輦糧斛以備入保其大軍屯駐亦須計權委自兩路漕臣以次津發但令前後相繼不至乏絕不可多存若有人無糧縱能輕入何敢久駐其餘金帛馬草之類皆依倣並行竊慮亦合明降指揮飭江東淮南當職官吏同為措置敵若知此與清野何異實為上策八曰戒覈官吏檢會前降指揮內一項敵人去冬深入其諸州郡守臣等不能召募忠義勇敢人兵留處城

中悉力捍禦共為死守之計又不能措置般移糧食遷徙人民擇深山大澤率衆固守束手端坐敵人既至則以一身逃遁致使一城生靈枉遭塗炭奉聖旨下江浙諸州如敢依前失行措置止以一身逃避者當明正典刑臣契勘朝廷措置既已備具號令既已明審唯在守之以人承平之時一官不治止廢一官一邑不治止廢一邑利害無所相關至於用兵則環千里之地成敗得失皆相與為先後譬之一身手足耳目各有所司苟廢

其一身與之俱故不可使一官不脩其職一人不盡其力昨承平既久玩習成風例不肯以身任責苟簡文具姑應目前一遭警急皆望風先遁遠出疆界遂使生靈陷於塗炭井邑鞠為丘墟及至事定徐還往往反以收復論功事既出倉猝且所干人衆難以盡責因得原釋昔陳豨反代趙周昌奏常山二十五城亡其二十城漢高祖曰守尉反乎對曰不上曰是力不足亡罪日近新疆敵人驟至城守之計初無素備有官守者棄而來歸

朝廷推此以廣仁心苟免降屈貸而不問猶之可也若
江南諸郡入有城郭出有兵將所恃有民所資有食咫尺行關動干大勢豈可不責之以必守乎而人情習慣
妄恃寬典尚無慷慨激昂之志夫守以兵者必責之將
守以民者必責之吏兵不可使一卒怯而輕退將必先
之民不可使一夫懼而輕散吏必先之將能死敵然後
兵能死戰吏能死職然後民能死守竊慮亦合明降指
揮應備禦之事既已備具將來或有警急輒棄官守妄

作緣故逃避出界之人並依軍法從事必罰無赦庶無
玩令稍知事君之義右上件所陳皆是朝廷已行之命
臣但將案籍檢舉參驗古事稽察人情擇其可以施行
責付官吏者講之於無事之時行之於有警之日寧可
有備而不用不可當用而無備是用輒敢塵犯天威伏
惟陛下寬貸而曲赦之臣無任惶懼激切屏營之至謹
錄奏聞伏候勅旨

貼黃臣聞兵家先聲後實臣所陳皆是朝廷已行命

令州縣職事所當為但欲檢舉申飭上下協心行之得人使敵人望風知畏不敢輕動而已並無勞民費財之弊昔孫權以葦荻為疑城殆同兒戲而曹丕遠懼符堅淝水之敗望見八公山草木皆成人形而遁去今若預令將士分守其地鄉社團集有所傳之四遠以張國威即廣軍聲過於葦荻草木遠甚伏乞睿察

臣今來所陳正是本道職事不敢無及旁路然界

分遠近上連下接如淮東沿海事體一同利害均
一如蒙採取即淮東浙西亦合依此施行伏乞睿

察

夢得為戶部尚書奏乞徙敵人必經由州縣居民劄子
曰臣竊見冬候漸深金人往來倏忽無常未能保其不
南牧先事預備當有萬全不可勝之計臣前嘗妄議敵
反用吾術若欲以中國攻中國故凡人馬糧草器械城
池皆因我以為用今必禁之使不得行其謀亦在反用

其術而已古之外域善待中國者莫若藏其輜重人畜
遠引深避而不爭鋒漢武帝初命衛霍連年伐匈奴所
至斬首拓地無不如意者以匈奴兵力與漢相當而較
勝負故也其後匈奴覺悟作空地避漢之計至公孫賀
趙破奴引師深入二千里不見敵而還遂困大漢於是
不出兵者幾十年元豐間神宗皇帝銳意必討西夏經
營累歲遂詔五路並入是時天下皆意夏人必可蕩滅
然終無成功者亦以夏人盡空其地去之而我無與敵

也臣愚竊惟今敵南侵之路不過京東京西與沿汴三處若度其必經由州縣徙其居人令先埋瘞斛斛錢物各以金銀輕齎四散擇深僻之地遠自藏匿雖馬草並皆盡野燒焚無得存留但能空地數百里彼脅諸國而來者不過以利誘之以結其心乘我潰散以作其勢使所至州縣皆空無所得自己失望其衆久不見敵則勢亦隨挫設其腹心必欲擾我者若行三日人無糧馬無草凡欲因我為利者皆無所得則雖欲前進可乎議者

或恐以動衆不可為是大不然夫擾民動衆戒於承平
可也今敵衆所至剽劫之害金珠玉帛盡從攘奪則與
藏瘞而存之孰利屠剝之虐父子兄弟盡從殘滅則與
奔趨而去之孰重民雖無知必有辨於此者此誠不戰
屈人之策伏望聖慈特賜睿察命大臣叅酌詳議如有
可取乞疾速密付所在監司州縣將帥令明以利害禍
福喻民使保萬全不唯伐敵之謀亦吾保民之計無大
於此

歷代名臣奏議卷三百三十四